

odnosno ostalim komponentama programskog rješenja - posebice, operativnom sistemu, aplikacijskom serveru i sistemu za upravljanje bazom podataka, posebno vodeći računa o funkcionalnosti, finansijskim aspektima i uslovima upotrebe određenog programskog rješenja.

XVIII.
(Registar rješenja i objekata)

Kanton će napraviti registar programskih rješenja u cilju efikasnijeg korištenja resursa i utvrđivanja usklađenosti sa ovom Odlukom.

Kanton će napraviti registar objekata koji će sadržavati sve elektronske dokumente, njihove segmente i elemente podataka u cilju standardizacije razmjene podataka.

XIX.
(Dostupnost podataka)

Kantonalni organi će razmjenu podataka između svojih baza podataka i baza podataka na drugim nivoima vlasti vršiti koristeći prethodno usaglašene web servise.

XX.
(Komunikacioni servisi)

Kantonalni organi će koristiti jedinstvene komunikacione servise zasnovane na paketnom protokolu TCP/IP. IP (Internet protokol) će biti korišten, dok će IP v6 biti planiran i podržan pri novim nabavkama.

Razdvajanje servisa po organima se ne mora nužno vršiti na fizičkom nivou. Uz odgovarajuće mjere sigurnosti, razdvajanje se može vršiti na mrežnom ili višem sloju TCP/IP protokola.

XXI.
(Servisi za kolaboraciju)

Kantonalni organi će koristiti integralne servise za prijenos odnosno pregled dokumenata i poruka, te direktorijske i domenske servise, uz potvrdu identiteta korisnika i korištenje digitalnog potpisa.

Kantonalni organi će koristiti uniformne servise elektronske pošte u grupnom modu, sa mogućnošću interne serverske pohrane podataka, mogućnošću usmjerenja toka dokumenata, te dodatnim servisima kao što su imenik, kalendar i šifriranje.

XXII.
(Sigurnosni servisi)

Svaka razmjena podataka preko javne mreže ima se smatrati nesigurnom, a u slučaju elektronske razmjene podataka zakonski klasificiranih kao osjetljivi podaci moraju se koristiti sistemi za šifrovanje.

Sigurnost podataka će se zasnivati na implementiranju upravljanja sigurnošću informacionih sistema prema važećem državnom standardu. Sigurnost informacionih sistema kantonalnih organa predstavlja dio ukupne sigurnosti informacija.

Kantonalni organi će na osnovu toga napraviti, implementirati i održavati vlastite sigurnosne procedure, uključujući testiranje, u cilju zaštite povjerljivosti, ispravnosti i dostupnosti podataka.

XXIII.
(Pohrana podataka)

Kantonalni organi će odabirati takva programska rješenja i definisati procedure pohrane podataka koji će korištenjem standardiziranih otvorenih formata osigurati da su podaci dostupni u budućnosti.

XXIV.
(Radna stanica)

Kantonalni organi će težiti elektronskoj obradi podataka, te koristiti serverski pristup i strukturiranu pohranu podataka.

Radna stanica će ovlaštenom korisniku omogućiti pristup informacionom sistemu Kantona, te zadovoljiti sve potrebe uposlenika za pristupom i obradom informacija u različitim

oblicima, kao i pristup komunikacionom i kolaboracionom sistemu.

Kantonalni organi će koristiti jedinstveno i standardizirano okruženje radne stanice kako bi olakšale korištenje, mobilnost korisnika i administraciju sistema.

XXV.
(Internet prisustvo)

Kantonalni organi će koristiti Internet u cilju predstavljanja i komunikacije, te težiti potpunoj elektronskoj interakciji sa korisnicima. Internet stranice će biti standardizirane kako bi stvorile bolji dojam kod korisnika, te olakšale korištenje.

Vlada će usvojiti i implementirati konzistentnu politiku imena domena Kantona.

Primjena

XXVI.
(Evidencija i saradnja)

Zavod za informatiku i statistiku Kantona Sarajevo (u daljnjem tekstu: Zavod) će voditi ažuran registar programskih rješenja i registar objekata Kantona iz tačke XVIII (Registar rješenja i objekata).

Organi Kantona će dostaviti Zavodu podatke o postojećim programskim rješenjima, te redovno dostavljati podatke o planiranim programskim rješenjima i njihovom usklađenosti sa ovom odlukom, odnosno izvedenim programskim rješenjima.

Organi Kantona će za nova programska rješenja i projekte u oblasti IKT prije odobrenja utroška sredstava pribaviti mišljenje Zavoda o usklađenosti sa ovom odlukom.

Zavod će sa kantonalnim organima ostvarivati saradnju u cilju primjene ove odluke.

XXVII.
(Razrada)

Zavod će po potrebi Vladi predložiti donošenje drugih odluka kojim se precizira primjena ove odluke.

XXVIII.
(Početak primjene i objavljivanje)

Ova Odluka primjenjuje se danom donošenja, a objavit će se u "Službenim novinama Kantona Sarajevo", na zvaničnoj internet stranici i oglasnoj tabli Kantona.

Broj 02-05-25465-9.6/09
5. novembra 2009. godine
Sarajevo

Premijer
Besim Mehmedić, s. r.

Na osnovu čl. 22. i 24. stav 2. Zakona o Vladi Kantona Sarajevo ("Službene novine Kantona Sarajevo", broj 24/03 - Prečišćeni tekst), Vlada Kantona Sarajevo, na 30. sjednici održanoj 5. novembra 2009. godine, donijela je

ODLUKU

O STANDARDNOJ RADNOJ STANICI U KANTONU SARAJEVO

I.

Ovom Odlukom Vlada Kantona Sarajevo propisuje konfiguraciju standardne radne stanice kantonalnih organa uprave i stručnih službi, te kantonalnih upravnih organizacija Kantona Sarajevo (u daljnjem tekstu: Kanton), u pogledu hardverskih i softverskih zahtjeva, radi postizanja kompatibilnosti i stvaranja jedinstvenog radnog okruženja.

II.

Državni službenici i namještenici (u daljnjem tekstu: zaposlenici) Kantona kao pomoć pri obavljanju svojih obaveza i zaduženja koriste informatičku opremu (radne stanice - računare, štampače, skenere i sl.).

Ova oprema mora zadovoljiti minimalne tehničke uslove kako bi zaposlenici mogli što efikasnije obavljati svoje radne

zadatke i razmjenjivati informacije sa ostalim zaposlenicima i poslovnim partnerima.

U skladu sa potrebama radnog mjesta, korisnici mogu biti standardni i napredni, od čega zavise tehnički uslovi. Svi zaposlenici su standardni korisnici, a rukovodilac organa određuje napredne korisnike.

Za nabavke nove opreme se određuju standardni tehnički uslovi. Napredni tehnički uslovi se određuju pojedinačno od slučaja do slučaja.

III.

Tehnički uslovi u pogledu hardverskih komponenti radne stanice odnose se na procesor (CPU), radnu memoriju, tvrdi disk (HDD), optički disk (CD/DVD), mrežnu kartu, zvučnu kartu, monitor, tastaturu, miš, te na vanjske izlaze kućišta.

Svaka radna stanica mora zadovoljavati minimalne tehničke uslove u pogledu hardvera, kako bi se omogućio nesmetani rad. Radne stanice koje ne zadovoljavaju minimalne tehničke uslove se predlažu za otpis.

Pri nabavci računara se poštuju standardni tehnički uslovi. Rukovodilac organa može tražiti posebne tehničke uslove za naprednog korisnika.

Radne stanice koje se nabavljaju moraju imati najmanje tri godine garancije od strane proizvođača, te osigurane rezervne dijelove od strane isporučioaca.

IV.

Radne stanice u pravilu rade pod istim operativnim sistemom (sistemskim softverom). Rukovodilac organa može donijeti odluku o nabavci posebnog operativnog sistema u slučaju specifične potrebe određenog programa.

Na svaku radnu stanicu mora biti postavljen način na koji se korisnici prijavljuju za rad sa korisničkim imenom (username) i šifrom (password).

Operativni sistem mora imati regionalne postavke i postavke jezika čime se dobiva pravilan format datuma i rad tastature.

Operativni sistem i programi na računaru mogu biti na engleskom, bosanskom, srpskom ili hrvatskom jeziku, u zavisnosti od mogućnosti i potreba korisnika.

Svaka radna stanica u pravilu ima sljedeće funkcije: rad u uredskom paketu (programi za obradu teksta, tabela i prezentacije), PDF pregled, PDF štampač, rad sa arhivama, pregled slika, pregled videa, pretraživanje Interneta, komunikacija putem e-pošte, zaštita od virusa.

Rukovodilac organa može u cilju sigurnosti onemogućiti pristup Internetu.

Svaka radna stanica mora imati i potrebne pomoćne programe.

Radna stanica može imati i posebno nabavljene programe, o čemu odluku donosi rukovodilac organa.

Na radnim stanicama koje koriste napredni korisnici se mogu postaviti i drugi programi, o čemu odluku donosi rukovodilac organa u pojedinačnim slučajevima. Operativni sistem i programi postavljeni na računaru, na kojim je to moguće, se automatski ili ručno ažuriraju u cilju zaštite od propusta i popravka funkcionalnosti.

V.

Operativni sistem i programi koji se koriste na radnim stanicama u Kantonu su licencirani ili besplatni.

VI.

Zavod za informatiku i statistiku Kantona Sarajevo (u daljnjem tekstu: Zavod) donosi odluke kojima specificira minimalni i standardni hardver i standardni softver za standardu radnu stanicu.

Odluke iz stava 1. se primjenjuju za kantonalne organe uprave i stručne službe, osim u slučaju da rukovodilac organa donese posebne odluke za svoj organ.

VII.

Organi Kantona će za novu računarsku i komunikacionu opremu prije odobrenja utroška sredstava pribaviti mišljenje Zavoda o usklađenosti sa ovom Odlukom.

Zavod će sa kantonalnim organima ostvarivati saradnju u cilju primjene ove Odluke.

VIII.

Ova Odluka stupa na snagu danom donošenja, a objavit će se u "Službenim novinama Kantona Sarajevo", na zvaničnoj internet stranici i oglasnoj ploči Kantona.

Broj 02-05-25465-9.4/09
5. novembra 2009. godine
Sarajevo

Premijer
Besim Mehmedić, s. r.

Na osnovu čl. 22. i 24. stav 2. Zakona o Vladi Kantona Sarajevo ("Službene novine Kantona Sarajevo", broj 24/03 - Prečišćeni tekst), Vlada Kantona Sarajevo, na 30. sjednici održanoj 5. novembra 2009. godine, donijela je

ODLUKU

O UTVRDIVANJU DOMENE I PODDOMENA INTERNET PORTALA I ADRESA ELEKTRONSKE POŠTE U KANTONU SARAJEVO

I.

Ovom Odlukom se utvrđuju nazivi domene i poddomena internet stranica Skupštine, kantonalnih organa uprave i stručnih službi, te kantonalnih upravnih organizacija Kantona Sarajevo (u daljnjem tekstu: Kanton) i adresa elektronske pošte (u daljnjem tekstu: e-pošta) zastupnika u Skupštini, članova Vlade te državnih službenika i namještenika Kantona (u daljnjem tekstu: zaposlenici).

II.

Kanton Sarajevo za predstavljanje na Internetu koristi domenu "ks.gov.ba", registrovanu kod institucije nadležne za upravljanje "gov.ba" domenom.

III.

Utvrđuje se potreba razdvajanja internet adresa Vlade i Skupštine, uspostava internet portala Vlade koji će objediniti stranice pojedinih kantonalnih organa uprave, te izravnog pristupa internet stranicama pojedinih kantonalnih organa uprave i upravnih organizacija.

U cilju predstavljanja putem internet stranica ili adresa e-pošte na praktičan način utvrđuju se poddomene u obliku "ABC.ks.gov.ba" gdje ABC predstavlja skraćenicu Skupštine, kantonalnog organa uprave, stručne službe ili kantonalne upravne organizacije.

IV.

Internet adresa za Skupštinu, uključujući Kabinet predsjedavajućeg i zamjenika predsjedavajućeg i Stručnu službu za skupštinske poslove, je:

Skupština Kantona Sarajevo:

<http://skupstina.ks.gov.ba>

Internet adrese za Vladu i Kabinet premijera kantona su:

Vlada Kantona Sarajevo:

<http://vlada.ks.gov.ba>

Internet adrese za kantonalna ministarstva su:

Ministarstvo pravde i uprave:

<http://mpu.ks.gov.ba>

Ministarstvo prostornog uređenja i zaštite okoliša:

<http://mpz.ks.gov.ba>

Ministarstvo saobraćaja:

<http://ms.ks.gov.ba>

Ministarstvo unutrašnjih poslova:

<http://mup.ks.gov.ba>

Ministarstvo privrede: